


昭忠祠列傳續編

卷二百四



昭忠祠列傳續編卷一百四

浙江官員 勦辦粵匪

道員

趙景賢

田祥



趙景賢傳

趙景賢。浙江歸安縣人。父炳言。官刑部右侍郎。

國史有傳。景賢道光二十四年舉人。誤註烏程縣籍。經炳言奏請革去舉人。二十六年。景賢呈請捐復。並更正籍貫。禮部覈與例符。奏入。

允之。尋捐教諭。二十八年。選宣平縣學教諭。二十九年。改捐內閣中書。咸豐三年。粵逆竄江甯。江浙震動。署湖州府知府。王有齡飭所屬舉行團練。舉景賢為之倡。巡撫黃宗漢遵

旨督辦通省團練捐輸。復以景賢總其事。五年。巡撫何桂清奏景賢辦理捐輸團練已

歷兩載。勸捐至百萬兩之多。請加獎勵。命以知府歸保舉班。即用。並

賞加道銜。六年。以知府分發甘肅候補。十年。以吏部尚書許乃普奏保辦理浙江團練。命交替辦團練大臣邵燦差委。時賊竄廣德。景賢在江蘇聞警。即馳歸籌布城守。適衢州鎮總兵李定泰參將周天孚先後失

利。景賢收集潰兵為固守計。偵知江南  
援軍水陸並至。乃親督隊出城夾擊。擒  
斬數千名。立解城圍。逆旋由埭溪竄入  
杭州。景賢隨同提督張玉良馳援。復其  
城。並於湖州召募兵勇。添築新城。製造  
礮船。飭各屬集團。以次克復長興。德清。  
安吉。武康。孝豐等縣。四月。賊陷蘇州。擾

嘉興。景賢派隊駐南潯。扼其衝。賊旋從  
宜興。溧陽竄至太湖。夾浦。逼湖郡之西  
北門。記名道蕭翰慶率軍進援。遇賊戰  
歿。景賢招集潰勇入伍。賊圍五門。景賢  
督隊開奉勝門出擊。血戰數晝夜。斃賊  
無算。賊遁。五月。賊踞平望。復督礮船往  
勦。馳抵梅堰六里橋。見匪沿河築壘。釘

椿卽開礮燬其卡。並斃多匪。復派礮船分勦。自率親兵及團勇。由鶯脰湖一帶進攻。逼進六里橋。賊率眾迎拒。我兵水陸並進。鏖戰四時之久。賊敗走。隨將沿河賊卡燒燬。復添調楚軍。馳赴平望。密遣南潯雙林等處民團。襲破賊營東路。合軍於米市湖。突過賊濠。將礮臺拆毀。

斃賊千餘。賊驚竄。遂復平望。時賊偽英王仍由宜溧竄入。窺伺湖郡。景賢回救。合民團擊走之。經巡撫王有齡奏入。奉旨以道員用。

賞給額德木巴圖魯名號。並

賞戴花翎。六月。賊竄踞廣德州。景賢派兵堵勦。七月。賊大股來撲。我軍擊敗之。乘勝追

勦直抵城下。遂復州城。杭州將軍瑞昌  
等奏入奉

旨著交軍機處記名。遇有道員缺出。請旨簡放。  
方杭城之初復也。潰賊分竄湘屬之南  
鄉。新市。陳市。埭溪各鎮。景賢督水陸各  
軍馳勦。三閱月始就肅清。十月賊復圍  
省城。景賢率隊赴援。圍適解。而湖防又

告急。星夜馳歸。賊已至南門之峴山。忽  
報副將劉仁福督帶廣勇由昌化來援。  
駐軍北門新城內。潛與賊通。景賢偵得  
實。派隊由南門擊峴山之賊。自率勇出  
北門。誘擒仁福。梟其首。標示峴山。賊膽  
落。尋分股擾東鄉之雙林馬要等鎮。我  
軍合攻二十餘日。將賊營悉數踏平。十

一月。賊由機坊港。大錢等處來撲。分犯  
青銅門。及橫渚塘橋。馬賊由楊家莊來  
犯。均擊退。復由奚家莊西分撲。後路賊  
船直犯西門。官軍水陸迎勦。轟斃甚多。  
其分踞仁黃山之賊。亦經擊散。並殲其  
渠。遂分攻各山賊營。由隴山進勦。賊分  
路迎撲。礮斃騎馬悍賊多名。水陸夾擊。

復將後山弁山。及楊家莊賊卡。盡行燒  
燬。生擒二百餘匪。湖城圍解。敘功。

賞加按察使銜。十一年正月。克復長興。遂分勦  
東西山。及八都九都山界。並擊散宜興  
來犯之賊。尋賊陷太湖之洞庭東西兩  
山踞之。全湖失險。長興不能守。郡之北  
路七十二漚港。橫被竄擾。景賢於大錢

口添紮水師大營。聯絡民團。分顧各路。大小數十戰。皆捷。五月。賊大股由澈山溪竄踞南鄉之菱湖鎮。景賢親督水師。戰於雙福漾。分隊由長生橋夾擊。轟沈賊船數十。生擒賊目。奪船數百號。七月。平望之賊復竄南潯鎮。直至東遷石門之賊。由新市。仍竄澈山溪。我軍分路迎擊。大破之。九月。賊併力攻驥村晟舍。復逼郡城。景賢督軍水陸出勦。鏖戰五晝夜。賊遁。追至江蘇震澤境。斃賊無數。適太湖賊來犯夾浦。順帆往勦。時杭城被圍。餉道隔絕。景賢慮軍食不繼。率大隊滾營前進。由平政高橋雷甸。一帶猛攻。連破賊卡二十餘座。東山賊偵知我軍。

南向。乘虛襲大錢。景賢且戰且退。回軍掩擊。奪獲大小船二百餘隻。賊遁而東。南鄉從逆之匪復劫擾雙林鎮。景賢派隊馳救。旋聞杭城陷。嘆曰。四面皆賊。湖城孤注。惟當效死弗去。以報

國恩耳。遂與在城文武將弁民團誓以死守。十月。授福建督糧道。同治元年正月。

諭曰。趙景賢督帶團練。殺賊守城。戰功卓著。見當杭城失守。尚能激勵紳團。力保湖郡及所屬地方。並將遞送偽示之李元林。李元桂。正法。洵足以伸大義而固人心。在辦團人員中。最為異常出力。著加恩賞布政使銜。初賊匪逼郡城。僅太湖大錢口。可通運道。忽上年十二月。大雪三晝夜。礮船膠不能動。

太湖冰堅如平地。於是洞庭東山之賊履冰來撲。水師不能開礮。大錢陷。餉道遂斷。先是賊以湖防受挫。死傷枕藉。恨景賢刺骨。至是覓掘景賢父墓。戒不與交戰。但斷絕糧道以困之。景賢疊次開門出擊。輒不利。遂密寄帛書至滬。與其叔炳麟訣。誓以守死盡臣子之職。時

上猶以景賢能否赴任。

寄諭

欽差大臣曾國藩酌度情形辦理。復

諭浙江巡撫左宗棠設法傳諭該道。交代經手事件。輕裝赴任。三月。景賢於圍城中密奉飭知。並聞

恩命。軍氣復為一振。乃於各營挑選壯勇三千

名。由南北兩門出斫賊壘。並奪獲賊糧而還。時城圍日久。軍火糧餉日絀。每名兵只給米二合五勺。官民均食粥糜。繼而糠粃亦盡。但以草根樹皮充飢。道殣相望。景賢意氣不少挫。偵知管帶宜興勇縣丞李士元通賊。擒斬之。飢軍有掠掠民間者。仍按軍法。五月。援絕城陷。景

賢呼曰。我死無憾。誤我十數萬軍民耳。賊將偽慕王譚紹洸已叢擁到局。景賢冠帶見賊。喝曰。軍民幸勿殺。速殺我。譚逆為之改容。徐曰。亦不殺汝。景賢遂抽刀自斫。為所奪。擁之而去。到蘇幽之牢。始則挫辱之。至批頰流血。繼復謬為恭敬。百端誘脅。景賢不為動。作絕命詩四

章云。豈待孤城破。方嗟力莫支。從來疆  
守義。敢以死生辭。亂刃交揮處。危冠獨  
坐時。相持不相殺。鼠輩爾何知。裂眦呼  
狂寇。奚煩講說多。斷頭身自分。抗手意  
云何。厚貌徒為爾。孤忠矢靡他。空勞樽  
酒獻。罵坐更高歌。猝為羣盜困。遑敢學  
文山。且盡從容義。聊驚醜類頑。單詞明

順逆。正氣懾神姦。反覆誰家子。相看只  
厚顏。是豈天良見。環觀涕泗揮。但期能  
悔禍。豈必與生歸。伏劍余何憾。投戈汝  
莫違。漫收吾骨葬。暴露益光輝。偽忠王  
李秀成致書景賢。欲誘之降。復云。景賢

奉

命督辦民團。保守湖城。籌畫不周。糧絕至陷。其

時被執在局。即可自戕。因欲保全軍民。  
親見譚將官言之。言畢請殺。不解何意。  
堅不允從。抽刀自斫。又被奪阻。延息至  
今。揆之城亡與亡之義。一死已遲。無怪  
左右動疑。詢及尊意云何。景賢世受

國恩。萬勿他說。張睢陽慷慨成仁。文信國從  
容取義。雖不能效法古人。私心竊嚮往

之。若墮節一時。貽笑萬世。雖甚不才。斷  
不為此也。來書引及洪承疇。錢謙益。馮  
銓輩。當日已為士林所不齒。清議所不  
容。旋奉

純皇帝御定貳臣傳。名在首列。此等人何足比  
數哉。

國家定制。失城者斬。死於法。孰若死於忠。

泰山鴻毛審之久矣。左右果然見愛。則歸我者之知己。不如殺我者之尤為知己也。再來書稱賢為清官。提及清字。顧名思義。刻不容留云云。尋李逆前赴江北。密戒勿殺景賢。譚逆稍善視之。景賢初以未得死法。欲伺隙手刃李逆。自李逆去蘇。此志莫遂。與譚逆日輒詈罵。逆

攜常熟地圖以詢。遽付於火。曰。天戈所指。汝輩齧粉死矣。在城中不蓄髮。日危冠索飲。脅從者隱為化導。皆怦怦有反正心。遇鄉人則促之歸。或洩其事於譚逆。於是又欲殺之。適太倉敗賊到蘇。播言景賢通官兵襲蘇。譚逆設席招飲。酒次詰曰。汝通妖兵耶。答以我本官兵。何

得謂通。汝獻蘇城耶。答以蘇本

大清土地。何得謂獻。又曰汝今死期至矣。景賢仰天大笑曰。求之一年而不得者。今何幸也。遂肆口謾罵。譚逆卽取洋槍對曾一擊而殞。五月。曾國藩等遵

旨查明死事情形具奏。略言。景賢幼隨父任。讀書有奇氣。輒以志在千古為言。遇事喜

任人所難能。丁父憂。閉門讀禮。足不履長吏庭。素為浙江巡撫王有齡所器重。以紳士辦理團練。專湖防一面之任。三解城圍。每戰輒數晝夜。殺賊動盈萬。至不可數計。先後奪獲賊船大小千數百號。時乘閒四出赴援。當

簡放福建糧道之時。閩疆喫緊。需才孔急。假使

景賢遵

旨。交替湖防。自赴新任。誠如

恩諭。移其捍衛桑梓之力。以保障閩疆。厥功亦屬甚偉。揆以為

國惜身之義。亦未始無辭。而景賢感激益深。效死益堅。義不忍去。城陷之日。距賊圍城五月有餘。從來各處守城。未有如

此之久者。臣等遠隔賊巢數百里。無路能援。負疚徒深。景賢大義凜然。終能尋約。洵屬忠貞蓋世。可敬可哀。其長子趙深彥。年甫十二。聞湖州失陷。痛父情切。卽先服毒自盡。經湖南巡撫毛鴻賓奏

請

獎卹。其次子年甫數歲。幼者尚在襁褓。遠寄湖

湘孤苦無依。聞景賢在圍城中。未嘗一  
置念也。奏入。

諭曰。曾國藩等奏稱。趙景賢誓守湖郡。血戰三  
年。並分兵四出。恢復遠近堅城。賊匪畏不敢  
與戰。以大股合圍。斷其運道。至五閱月。糧盡  
援絕。城陷後。該道抽刀自斫。被賊奪阻。執至  
蘇郡。多方誘脅。百折不回。至本年三月間。罵

賊不已。被賊槍傷殞命。覈其死事顛末。洵屬  
皎然不欺其志。無愧完人。請照布政使陣亡  
例議卹。賜諡建祠。並將事蹟隨摺咨送軍機  
處。付史館立傳等語。趙景賢係湖州在籍紳  
士。並無守土之責。集團訓練。每戰必捷。迨至  
孤城困守。糧餉軍火俱盡。乃復堅持數月。力  
竭被擒。經賊匪誘脅百端。矢志不移。卒以身

殉。勁節孤忠。實屬可嘉。可憫。布政使銜福建  
督糧道趙景賢。著改為照巡撫例。從優議卹。  
並加恩。予諡。准其於湖州府地方。建立專祠。  
其業經議卹之長子趙深。彥著一併附祀。所  
有該員事蹟節略。著宣付史館。予立特傳。以  
彰忠蓋。其子趙濱。彥。潤。彥。滋。彥。溱。彥。溱。彥。均  
著俟及歲時。交吏部帶領引見。尋

賜卹如例。

予諡忠節。

恩給騎都尉兼一雲騎尉世職。

田祥傳

田祥。浙江山陰縣人。咸豐十一年九月。以粵逆偽來王陸順得由蕭山竄踞紹興府城。祥以湖南常德府知府候選道。在鄉聞警。憤不欲生。密赴沿江各處。邀約山陰舉人朱球。蕭山廩生王晃藻等八人。齊起義團。守衛鄉里。聯絡諸暨縣

包村義民包立勝共圖克復。同治元年  
二月。攻拔尖山臨浦山義橋水陸賊卡。  
殺賊多名。奪獲賊馬四十餘匹。礮五十  
餘尊。燒賊船百餘隻。遂進攻蕭山縣城。  
三月。回攻潭頭聞家堰沿江逆壘。時陸  
逆率眾四萬餘。圍攻包村。悉數回援。祥  
會同各董。帶領團勇。在歡潭附近之石

浦橋。扼要埋伏。其地負山濱江。形如乙  
字。水轉峯迴。迎面不能相見。義團憑險  
縱擊。殲斃逆匪無算。落水溺斃者數千  
人。陸逆僅偕三百餘騎。攀藤越嶺遁入  
蕭城。祥率義民圍攻蕭山東南兩門。旋  
分隊攻拔夏履橋賊卡。聲勢頗振。旬日。  
浙西逆黨麇至。分路包抄。義民連日分

股迎勦。因眾寡不敵。漸次退回。逆匪追至石浦橋。見賊尸山積。陸逆等憤前受創之深。下馬設祭。哭聲震野。次日。率悍黨號稱十餘萬。由東西北三面潮湧而來。大肆焚殺。民團多半傷亡。祥無奈奉母挈眷入包村。復偕包立勝及在村避難士民。多設方略。固守三月有餘。大小

四五十戰。殺賊尤多。逆賊連營三十餘里。圍之數重。始則火藥米糧無從採辦。繼則天時亢旱。水道被斷。五六月間。斗米賣錢十餘千文。濁水一甌賣錢五六文。貧民死於飢渴者不可勝數。七月。力竭。包村被陷。祥之母洪氏率子祥與祥弟邑庠生祈。闔門縱火自焚。其眷屬

親丁男婦三十八人同時殉難。二年十月。經江蘇巡撫李鴻章奏

聞。

諭曰。湖南常德府知府候選道田祥。在包村地方。齊起義團。奮力勦賊。屢次獲勝。嗣因眾寡不敵。米糧告匱。以致包村被陷。伊母洪氏。率子候選道田祥。生員田祁。闔門縱火自焚。並

田祚之妻俞氏。子兆榮。女繡月。繡屏。繡菊。繡丹。田祁之妻朱氏。田祥之妻俞氏。田祈之妻馮氏。田祁之子監生兆本。兆榮。女繡松。田祥之女八十。孫昇昌。孫女招辰。田祈之子兆松。兆榜。兆楨。兆模。兆楷。女繡春。繡葵。繡雨。兆本之妻胡氏。子克昌。允昌。元昌。兌昌。女似玉。寶玉。兆榮之子光昌。女貴玉。彩玉。兆松之妻謝

氏。女瑞芳。以及余元芳。並妻金氏。工人田瑞  
鳳。同時殉難。忠孝節義萃於一門。可嘉可憫。  
著交部從優分別旌卹。以褒義烈而慰忠魂。

尋

賞卹如例。

恩給騎都尉世職。



